

671.1238
078
121

卷四十一建置志上關隘
卷四十二建置志下倉儲
惠政驛遞 卷四十三武衛
志營制邊防海防海運附

永平府志

永平府志卷四十二

建置志十一

關隘

山海關卽臨榆縣之東門南十里爲南海口關明天啟

二年增設龍武營於此卽老龍頭也

顧祖禹讀史方輿紀要作東五

里極衝北十里

舊志作十里誤

爲三道關

案顧炎武郡國利病書山海關

明魏國徐公達所建爲朝鮮等國入貢及通遼商賈所由關法稽文憑驗年貌出入禁遼卒逆逃並商賈非法者宣德九年始設兵部郎中守之正統八年添設守備武臣同事正德二年逆瑾怙權矯上命以中官趙綱守之去主事五年瑾伏誅綱坐瑾黨罪廢設主事仍舊十二年復用中官王秩來守之革主事然綱雖逆黨猶能禮重士大夫繩家奴以法不敢大肆秩則縱暴網利錙銖無遺嘉靖改元剔除弊政復設主事而永革中官適豐都黃公景夔來乃呈部革守備同事越二年黃公代去值主事王公冕爲遼卒所

害鎮守太監李能圭設抽分而商賈尤困猶夫中官時也主事新昌鄔公關乃呈部題請永革之則嘉靖八年秋也顧祖禹讀史方輿紀要云山海關本名渝關蓋漢唐舊址非明朝創建亦有所據然究不免聚訟也詳見古蹟門渝關下又案山海關明洪武十四年徐達發燕石等衛屯兵萬五千一百人修永甯界嶺等三十二關宏治中薊遼巡撫洪鐘築邊牆自山海抵居庸凡二百七十餘處隆慶中軍門譚□□築敵臺三千自居庸東距山海關余儀部一元山海關志云邊牆南入海北抵角山絕壁牆外仍浚有池俱明初徐武甯建後沿牆增設敵臺防守明嘉隆以前原額邊牆八千五百七十六丈六尺萬厯七年增築南海口入海石城七丈都督戚繼光行參將吳惟忠修國朝康熙七年重修

三道關在臨榆縣東北十里關凡三重一設澗口澗水

冲刷基址僅存一建山麓一踞嶺腰懸崖危磴險巖

難行其閒舊有旱門關角山關寺兒峪關皆砌塞角

山關在角山之巔長城補山截谷紆回其上由三道關而北二十里爲一片石

一片石關在臨榆縣東北三十里一名九門口東西門各一其西門額曰京東首關東門外爲邊城關正東向又折而東南直抵角山之背復設正關門六以洩水合之凡九門云今已半圯守兵築黃土牆補之高三尺上披荆棘闌行人出入東南隅闢小水門一以洩山水與內城之南水門隔河相映又北二里爲廟山口又北二里爲西陽谷皆廢又北五里爲黃土嶺

關案讀史方輿紀要云一片石關有城其北三十餘里曰大小尖山又北三十餘里曰大小橫嶺自大

橫嶺五十餘里曰平漫川又十五里有孤山自孤山至遼東界三山營四十里南去一片石凡百六十里嘉靖三十九年朵顏衛影克勾致把都兒犯一片石戍將郭琥敗卻之邊防攷一片石西有鐵鹿崖稱爲隘要其相近者又有亂石關諸關皆有

小城亂石關今名濫水關在寺兒峪南

黃土嶺關在臨榆縣東北四十里關設嶺脊西南二里

許有山圓小堡枕其下地勢廣五六里長倍之路多

碎石而平馬可馳驟然不通轍跡關外悉平岡寬敞

二十餘里西至黃土營十五里北至無名口十里

案舊

志有大安口關在臨榆縣東北三十里今久廢不詳所在要當去黃土嶺不遠

無名口卽大青山關在臨榆縣東北五十里明宏治中

移建今仍以無名口稱山勢自西北蜿蜒而來南折

爲嶺嶺南一山頂圓而微高邊城緣嶺上關倚北山
路可通馬關南有空城一甌石墮壞自西門入東上
邊牆登敵臺遠望百里外皆坡陀有澗水西流入炕
兒峪又北十里爲小河口

小河口關在臨榆縣東北六十里關東北向左右山皆
高百尋相距僅三四丈而支腳湊聚如人合手拱抱
促狹不能容百人中有微徑可通馬關外稍寬明時
併關於娃娃峪堡今堡廢又西北七里爲大毛山

由關

外行七里由
關內行八里

大毛山在臨榆縣北七十里城據山腹山不甚高而數

峰連起直豎如柱可十餘仞俯臨城北東南兩面皆
土坡坡下寬二三丈或五六丈路旁有古井水味甘
冽由井北行迤東里餘高山矗立雙峰如駢指在關
門之右連起一山巖業高峻在關門之左橫頓爲嶺
高可數十丈嶺脊爲邊城細路盤繞人馬可登出關
北望羣山環顧儼若大將當關敵皆懾伏關南則重
巒複嶺蟻聚蜂屯山勢至此又一聚矣西至董家口
二里案小毛山口有關明時小毛山失守移入大毛
山口以上四口在舊志與廟山口西陽口俱
爲董家口內之小口

董家口關在臨榆縣北七十里山多平易登惟左側一

山陡起如獅形南向東首邊城橫扼其項又東卽大毛山之背地勢甚狹口外羣山糾紛溝路拗仄僅通匹馬與遷安之董家口名同實異明嘉靖初移石門兒柳河衝二堡於此有泉自南而北西流入城子峪河又北有徑至城子峪關外約三里由堡至城子峪五里

案讀史方輿紀要邊略云董家口北二十六里曰龍潭又北十五里曰橫嶺又北五十五里爲十字河又五十五里曰長嶺又北五十五里曰大滷場三衛侵軼往往出沒於此

城子峪在臨榆縣北七十五里明嘉靖元年移西家莊仍舊名卽此關北向西山微高山腳東迴爲漫坡邊城緣坡曲折坡斷處爲河河東一山形類覆釜高二

三十丈左側有澗狹而深舊築空心臺以塞澗口今

已半圯其東西兩山相距半里許路多碎石無轍跡

然馬易馳騁可聯百轡行近關諸山零星散漫低若

伏龜隨處可升關南爲堡今已廢有水自北來經河

口前入關南流折而西爲莊河又西南流入大石河

由關西北行三十里至梅花溝與河口一路東北行

二十里至官場又十里至大橫嶺又四十里至白棗

林又東通中後所大路凡一百二十里自白棗林分

路北行二十里至磨石嶺又北至和尚房通三座塔

大路東行至望岡臺六十里合九門口路又十里至

前衛北至水門寺五里

舊志城子峪與水門寺平頂峪皆爲板場峪關內之小口

就見在形勢言之城子峪爲大水門平頂板場皆在河口內而板場尤小

水門寺卽河口關在臨榆縣北八十里明嘉靖元年移水門寺於黃土坡卽此關東向其北山高數十仞南高十餘仞邊城自北而南約三四百步強半摧殘居民捐修矮牆樹柵爲關關外對面一山尖秀可愛山麓有大石卓立如勇士戴兜鍪狀土人謂之將軍石口內路狹難行口外河灘極闊石細碎而平可容萬人自灘而南直抵城子峪則河口據上游矣其水自北山葫蘆套溝發源至關外橫流而南入城子峪口

由關東北行三十里至大橫嶺又三十里爲建昌縣界西北行三十里至梅花溝又十八里至偏石合義院口路皆通馬西至平頂峪五里

平頂峪在臨榆縣北七十五里西有大山與長峪相接循麓北行陰崖壁立邊城自峰頂層級而下其西北拖腳一山高三四丈頂平而長橫列如臥蠶邊城卽築其上峪名平頂蓋肖形也平山斷處距東山二百餘丈皆乾流碎石關門頽廢無存關內半里許爲堡亦廢惟遠山險要非出河口無大路由堡南行二里餘右側有數峰尖削森森如玉笋又南爲莊河邨涓

流環繞峰巒競秀居民稱富庶焉有泉自口外發源
南流入大石河西南至板場峪三里

板場峪在臨榆縣北七十五里山勢平漫邊城殘壞由
堡東北行二里許皆澗水碎石闊約二三十丈路旁
有石城今廢又東北里餘爲老邊城東西橫亙設水
關二已圯出老邊城東北行林木茂密碧草沒徑約
二里始抵新邊城左右山較險峻兩峰低處爲嶺城
依嶺側有口可通馬惟口外僅至平頂峪餘別無路
南至義院口十里

舊志作
四里

義院口關在臨榆縣北六十五里關西北向右雙峰高

聳南峰貫頂側下形如魚脊首注河流邊城屈曲如
鉤倒挂尾上其左山則層疊而下臨水壁立高二三
丈迤南四山聯屬長五六里廣參之二城倚關內關
門傾圯設柵稽出入餘則疊石爲牆高四尺許上護
荆棘下開水竇出關數十武遙望遠山皆坡陀道路
寬敞人馬往來踵相接城南爲教場瀕河居民五千
餘家其東南諸山邐迤及石門砦多產煤有水發源
於口外之中杌嶺卽大石河南流入關深可及股由
石門砦東經臨榆城西入海由關西行三里至山神
廟合挈子峪路又十二里至三岔山又十五里至三

間房合箭桿嶺路又二十里至龍王廟又十五里至偏石又十五里至煙臺子又二十里至乾溝爲臨榆之巨鎮東通奉省錦義二州大路東北西三面通熱河入溝塔子溝哈達三座塔等處大路自乾溝北十

里至陽嶺與建昌縣分界西至挈子峪三里

案讀史方輿紀

要云義院口西南十二里曰石橋谷又南十三里曰石門寨東八里爲長谷營皆有小城戍守邊略云義院口北九十里地名常海賊巢也又北二十八里曰三岔口又北三十五里曰紅草溝景泰中朵顏來犯縣北之車渠莊官軍擊敗之於紅草溝是也又老嶺在舊邊外山陡險難修邊牆萬厯初設墩臺於此志云老嶺在長谷口外二十餘里

挈子峪在臨榆縣北六十八里山下爲堡石城頽廢其

西山兩峰駢列北一峰微高邊城自左而右關界其中爲澗水所衝已非舊制寬約十餘丈而路坦易人馬通行邊城內林樹陰森草木叢密行人隔數武卽不見南接花場峪北聯義院口形勢較爲要害有泉水自近口各山匯流而入經堡西南下東南流至石門砦入大石河由關西北行二里至灰窰溝又一里至山神廟合義院口大路南至花場峪十二里

花場峪在臨榆縣西北六十里明時移細夯口

夯或作谷關

家莊仍舊名卽此關南一山中凹而陡極高峻絕頂皆立石北山略卑亦勢如削壁兩山相距可三十餘

丈邊城橫亘其間關門已圯外有大山障之卽老嶺
之東面也關內居民千餘家負山臨水道路坦夷有
泉發源於口北之龍潭碧波湧沸南流十二里入關
又南十餘里至石門砦入大石河關左山坡有石城
一由關西北行八里至清水關又十二里至孛羅嶺
又五里至牛心山又五里至土衙衙又五里至三間
房合義院口路卽達乾溝西南至葦子峪十五里
葦子峪在臨榆縣西北六十里由柳罐峪東行四里至
三楊砦折而北三里至楸子峪又西北六里至車場
溝約闊百餘步循水涯曲折而北亂石滿徑二里許

凡七渡河塞河怪石大如熊羆宛轉石中可通匹馬
又北里餘卽葦子峪堡河愈寬石愈多東西山極陡
峻高可數里邊城自西南頂遞降而下距河東岸幾
二百丈關城皆蕩於水卽石河之西派也發源老嶺
下入口東南流二十里至石門砦歸大石河由峪北
行至老嶺路極坳險不與他口通居民非樵蘇罕有
至者西南至柳罐峪十六里

柳罐峪堡在臨榆縣西北五十五里堡東北角有普陀
庵卽前明官署舊址 國朝康熙初改建堡西北四
里餘爲邊城山口闊十餘步左爲青山右爲金剛山